

1 Timoteo

Pablo Timoteore gojabeopu

1 ¹Yuhu Pablo mure Timoteore ire gojabeogu iiaa. Goamu marire peamegue wabonirare taudigu ahrimi. Jesucristo yare buhedoregu igu apidigu ahraa yuhu. Mari Pagu Jesu mera igu dorediro dopa igu apidigu ahraa. Jesu ta marire itamumi. Eropira marire igu tauborore masira irire mucubiri cohrea mari. ²Yuhu mure Jesucristo yare buhecū peegu Jesure umupeonugabu. Eropigu mahu diaye ta yu magu iro dopa arigu ta ahraa. Eropigu Goamu mari Pagu mera, mari Opu Jesucristo mera oadore mure. Eropigu igu itamuri mera oaro arique mahu.

Pablo guya buherire buhedorebiripu

³Sohō arirasubure Macedonia yebague wagu mure Efeso macague api tari wahgabū. Ero yujurayeri gaji buherire guya buherā arima. Iri buherire buhedorebiribure apibu yuhu mure. ⁴Erā guyarā erā gamero buhemaacāma. Erā acawererā iribojegue majarā erā arī bocarare eropa buheniguicāma. Iri buheri mera gajirāre dūyasocū iima. Eropira Goamu igu dorerare gajirāre iicū iibeama erā eropa buherā. “Goamu yare itamugucumi,” arī umupeorā igu dorerare iima. Eropigu erā gamero buhedorebiribure apibu yuhu mure.

⁵Goamu opa gahmeme. Neri dipuwaja mariri mera, ōari guñari mera, diaye Jesucristore umupeori mera, gajirāre mari mahi umupeoburire gahmeme. Irire erā iiboro dopa apibu mure. ⁶Erā yujurayeri i ōari buheripure cōātuha gaji buheripure gahmema daja. Eropira iri buheripure dūyaso gorowerema. Iri erā buheri erā game dūyasori duhpiburi aribeaa. ⁷Erā Moise dorerire masare buherā arīdiaquererā ta erā basi ne ōaro masibeama. Eropira guhyadiaro mera buhequererā erā buherire ne masibeama erā.

⁸Moise dorerire diaye ta mari buhecū ōari doreri ahraa. Irire mari ōaro masia. ⁹Iri dorerire buherā ire masiro gahmea: Iri doreri ōaro iirāre erāre buheburi aribeaa. Nero iirāpūre erāre buheburi ahraa. Ōpa ta iirāre buheburi ahraa: Dorerire tarinugarāre, Goamure tarinugarāre, ñeri dihtare iirāre, Goamure gamebirāre, ñero werenigui corerāre, erā pagu sumarāre wejērāre, erā pago sā nomere wejērāre, gajirā masare wejērāre, ¹⁰nome mera ñero iirāre, ūma mera ñero iirā nomere, ūma seyaro ñero iirāre, nome seyaro arīquererā

ñero iirãre, masa porãre yaja duarãre, gũyaricũrãre, Moise dorerire erãre buheburi ãhraa ii. Eropiro gajirã árípehrerãre òari buherire tarinũgarãre buheburi ãhraa Goãmũ ìgũ doreri. ¹¹Goãmũ òagũ ìgũ òari buheri mera iri ñeri iirare cóãdoremi. Iri buheripũre yũre Goãmũ buhedoremi.

Goãmũ ìgũ marire mojomoro ïarire werepũ Pablo

¹²Eropa yũ buhecũ, Jesucristo mari Opũ turarire ìgũ ogũ itamumi. “Pablo òaro buhegũcumi yahare,” arĩ pepiñumi Jesu yũre. Eropigũ yũre beyegũgue ta ìgũre itamubure apimi yũre. Ìgũ eropa iicũ “Õhaa,” arãa yũhũ ìgũre. ¹³Iribojegue yũ Jesucristore ñero wereniguiquerecũ ta, ìgũ yarãre ñero iiquerecũ ta ìgũ yũre beyemi. Eropigũ ìgũre masinibigũ ìgũ yarãre ñero iigũ “Ñero iigũ iica,” arĩ pepibirimũricarabũ. Yũ eropa masibiricũ ìagũ ìgũ mojomoro ïami yũre. ¹⁴Eropigũ Goãmũ mari Opũ yũre bũrigã mahigũ òaro iimi yũre. Eropigũ Jesucristore umupeocũ iimi ìgũ yũre. Eropigũ ìgũre masa sãre mahicũ iimi yũre.

¹⁵Yũ gajirã tauro ñetariagũ áríribũ. Ñerã mari áríquerecũ ta Jesucristo mari ñerire cóãbu i yebaguere erami. Marire peamegue wabonirãre taubu erami. Iri diaye ta ãhraa. Ìgũ eropa árigũ áricũ árípehrerã irire masiporo. ¹⁶Ñetariagũ yũ áríquerecũ ta ìgũ yũre mojomoro ïami. Eropa mojomoro ìagũ Jesucristo guaro mariro, ìgũ yũre òaro iirare masicũ iigũ iimi. Pũhrũ ìgũre umupeomorã erã sã ìgũ òaro mojomoro ïaburire erã masiboro dopa òaro iimi yũre. Ìgũre eropa umupeorã árípehrerinũri ãmaroguere eropa òaro áriniguiçãrãcoma. ¹⁷Goãmũ árípehrerinũri masa tauro opũ ãhrimi. Ìgũ ne sĩribeamĩ. Mari mera ìgũ áríquerecũ ta ìgũre ïabeaa mari. Eropigũ ìgũ dihta Goãmũ gohra ãhrimi. Eropirã “Diaye ta òagũ, turagũ ãhrimi ìgũ,” arĩrã ìgũre. Ùmũri nũcũ ìgũre umupeorã. Eropa ta iirã.

¹⁸Timoteo yũ magũ iro dopa ta ãhraa mũhũ. Eropigũ dohpaguere ire mũre dorea. Jesu yarã Goãmũ ya weremũhtarã erã mũre werediro dopa ta mũre dorea. Cristo yare òaro wereniguique. Eropigũ ñero tariqueregũ ta ìgũre umupeo duhubiricãque mũhũ. ¹⁹Jesure eropa umupeoniguiçãque. Ñeri dipuwaja mariro árique. Eropigũ òari dihtare iique. Yujurãyeri irire iibirã Jesu yare erã cohãma. Eropa cóãrã ìgũre umupeo duhucãma. ²⁰Eropa ta iiama Himeneo, Alejandro mera. Eropigũ “Watĩ ìgũ gamero erãre iiporo,” arĩgũ eropa apicãbũ erãre Goãmũre erã ñero wereniguinemobiriboro dopa.

Goãmũre serẽbasarire werepũ Pablo

2 ¹Dohpaguere òpa arĩ doremũhtaa mũare: Árípehrerã ya áríburire Goãmũre serẽbasaque. Eropa serẽrã “Õhaa,” arĩque Goãmũre. ²Oparã, gajirã masa tauro dorerã sãre, erã òaro doreburire Goãmũre serẽbasaque erãre mari òaro áricũ áríboro dopa. Eropirã gamequeãro mariro ñeri marirã Goãmũre umupeorã mari òaro áríboro dopa erãre serẽbasaque. ³⁻⁴Eropa ta gajirã ya áriburi sãre mari Goãmũre serẽbasacũ òapũricãa. Irire mari iicũ ìagũ Goãmũ marire taubupũ marire òaro ïhasũami. Árípehrerã masa peamegue wabonirãre ìgũ taumorã dihta áricũ gahmemi Goãmũ. Eropigũ òari buherire

diaye majare erã masicũ gahmemi ãgu. Eropigu gajirã ya árĩburire mari ãgure serẽbasacũ mucubirimi Goãmu. ⁵Yujugu ta áhrimi Goãmu. Eropigu Goãmu mera mari õaro áricũ amubasagu yujugu ta áhrimi. ãgu áhrimi Jesucristo. Jesucristo sã masu ta áhrimi. ⁶Eropigu árĩpeherẽ erã ñeri iira dipuwajare wajayebasadigu árĩmi ãgu crusague síridigu. Eropigu Goãmu ãgu queorasubu masare ire masicũ iimi. ⁷Masa masicũ iibure ãgu yare werebure irire Goãmu yure apimi. Eropigu judio masa árĩbirãre Jesure umupeoburire õari buherire buhebure beyemi yure. Diaye ta mure weregu iiaa yũhu. Guyabeaa.

⁸Árĩpeherero majarãpu Goãmu yare õaro iirã Goãmure erã serẽcũ gahmea. Eropa Goãmure serẽrã erã guaro mariro, game dũyasoro mariro erã áricũ gahmea. ⁹⁻¹⁰Nomepũre Jesu yarã erã õaro árĩricũre iicũ gahmea. Eropirã queoro erã ejatuharo suhri sañarã árĩporo. Eropirã gajiropa bejari poaricu “Yũhu õago áhrra,” arĩ íhmubiricãporo. Eropirã õari dari oro dari waja pagari bũyarire, õari suhri waja pagari suhri sañarire guñabiricãporo. Eropirã õaro erã iira mera, erã õarã nome Jesu yarã nome erã árĩrire ii íhmuporo. ¹¹Ejarimariro umupeori mera peerã õari buherire peeporo erã nome. ¹²⁻¹⁴Eropirã nome mña gamenererogue umare buhebircãporo. Eropirã umare dorebiricãporo. Erã nomepũ ejarimarirã nome árĩporo. Goãmu Adãre íhacũnugumũhtaũmi. ãgu puhrũ Evare íhacũnuguũmi. Eropigu watĩ ãgu gũyacũ peedigu Adán árĩbirĩũmi. ãgu gũyacũ peedigopũ Eva árĩũmo. Eropa ãgu gũyacũ peego Goãmure tarinũgago waũmo igo. Eropirã nomepũ umare dorebiricãporo. ¹⁵Nomeo árĩmũhtadigo igo tarinũgaquerecũ ta nome erã porãre õaro opacũ ãagu erãre Goãmu peamegue wabonirãre taugũcumi. Eropirã nomepũ Goãmure erã umupeoniguicãcũ, Goãmu erãre itamugũcumi. Eropigu masare Goãmu sãre erã mahiniguicũ pee masirã nome erã árĩniguicũ Goãmu itamugũcumi erãre.

Jesu yarã tauro oparã erã iiburire werepũ Pablo

3 ¹Jesu yarã doregu árĩdiagu õarire iidiagu áhrimi ãgu. Iri diaye ta áhrra. Eropigu Jesu yarã doregure apigu õpa árĩgũpũre beyeque. ²Dipuwaja marĩgure beyeque. Eropirã gajirã ãgure weresã masiya mara. Eropigu yujugore ta marapocũgu árĩgure beyeque. Eropigu õaro pee masigure, guhyadiagure, masare õaro mera ãgu wihire ñajaridoregure, gajirãre õaro buhemehregure beyeque mña. ³Eropa beyegu ne merebigure, gamequeãbigure, masare õaro iigure, game dũyasobigure, niyerure gamebigure beyeque. ⁴ãgu porãre ãgu marapo sãre ãgure umupeori mera erã yũhrirã áricũ iigure beyeque Jesu yarãre dorebure. ⁵ãgu porãre ãgu marapo sãre õaro yũhricũ iimasibigu árĩgu Goãmu yarã sãre õaro yũhricũ iimasibiribocumi. ⁶Jesu yarã opũ árĩbure beyegu ne Jesu yagu ñajagure beyebita. Ne ñajagure beyecũ ãgu “Jesu yarãre tauro áhrra yũhu,” arĩ pepibocumi. ãgu eropa arĩ pepicũ Goãmu ãgure dipuwaja moadorebocumi watĩre ãgu iidiro dopa ta. Watĩ Goãmu tauro árĩdiari waja Goãmu ãgure dipuwaja moapũ. Eropigu ne Jesure umupeogu árĩgure beyebita. ⁷Jesu yarã doregure beyegu Jesu yarã árĩbirã “Õagu áhrimi,” erã arĩgu dihtare

beyeque erã ïgure werewuabiriborore. Õaro iigu ïgu áribiricũ ïarã gajirã ïgure werewuabocoma. Eropigu ïgu watĩ gamero dopa ta iigu áribocumi.

Jesu yarãre itamurã diáconoare erã iiburire werepu Pablo

⁸Eropirã Jesu yarãre itamurãpũre beyerã õarã árirã sãre beyeque. Erã guhyadiaro árirãre, õaro diaye ta wereniguirãre, merebirãre, niyerure gamebirãre beyeque mũhũ. ⁹Eropa ta Jesucristore õaro umupeorã “Goãmũ yare õaro diaye ta áhrra,” arĩã árirãre beyeque. ¹⁰Eropirã Jesu yarãre itamurã árdiarãre erã iirare ïamũhtaque mũa. Mũa eropa ïara puhũrũ erãpũ dipuwaja marirã árirã Jesu yarãre itamurã ñajaporo erã. ¹¹Eropirã erã marasã nomepũ õpa áriporo: Pee masirã nome, ñeri quere iibirã nome, guhyadiarã nome áriporo erã nome sã. Eropirã áripehleri õarire iiniguirã nome áriporo erã nome. ¹²Eropirã Jesu yarãre itamurãre beyerã yujurãyeri nome ta marapocũrã árirãre beyeque. Erã porãre gajirã erã ya wihĩ majarã sãre õaro ïhadiburã árirãre beyeque. ¹³Mũ eropa beyenirã Jesu yarãre õaro erã itamucũ gajirã erãre õaro ïhasuarãcoma. Eropirã õari buherire, Jesucristore erã umupeoburi sãre guiro mariro buherãcoma erã.

Goãmũ ya buherire werepu Pablo

¹⁴⁻¹⁵Dohpaguere mũ pohrogue wadiagu iiraa. Eropa wadiaqueregu dohpaguere wanibigu ipũ mera mũre were gojabeogu iiaa. Jesu yarã gamenererã watope mũa dohpa iiborore mũre were gojabeogu iiaa, “Dohparagãre wabiriboca,” arĩgu. Jesu yarã Goãmũ ojocarigu yarã áhrima. ïgu yarã diaye áriri buherire Goãmũ ya buherire õaro opama. Eropa oparã irire buheniguima. ¹⁶I diaye áhrra. Marire Goãmũ ïgu buhera mari õaro iiburi buheri áhrra. Goãmũ iri buherire marire masicũ iimi. Iribojegue mari masibirira mũra õatariari buheri áhrra. I buheri õpa áhrra:

ïgu Cristo mari dũpũ iro dopa ta dũpũcũgu masa dehyoadigu árimi. Õagu ñeri marigu ïgu áricũ ïhmudi árimi Espĩritu Santopũ. Anyua sã ïgure ïanirã árima. Eropirã gua ïgu buhedore apinirã gaji yeba majarãre ïgu yare buhebũ. Eropirã i yebare masa bajarã ïgure umupeoama. Puhũrũ umarogue Goãmũ aĩadi árimi ïgure. Iri ta áhrra õari buheri.

Õari buherire cóarãcoma arĩ werepu Pablo Timoteore

4 ¹Espĩritu Santo ire õaro weremi: Pehrerinũ coregã yujurãyeri masa Jesu ya buherire cóarãcoma. Eropirã guyarĩ buheripũre watĩ yare buherãpũre peenũrãcoma erã. ²Iri buherire buherã guyaniguirã wererãcoma masare. Erã guyaniguirãpũ “Gũa tamerare dipuwaja mara,” arĩ pepirã árirãcoma. Erã ñero iirãpũre ne guñasome. ³Õpa arĩ buherãcoma erã: “Marapocũbircãque. I barire babircãque,” arĩ buherãcoma erã. Erã eropa badorebiriqerecũ ta Goãmũ barire ïhacũnugudi árimi mari baburire apigu. Mari Cristore umupeorã áricũ õari buherire mari masirã áricũ, mari ya áriburire õarire iri barire apipũ ïgu. Iri barire oparã ïgure “Õhaa,” mari aricũ gahmemi ïgu. ⁴Áripehleri Goãmũ

ĩgu ĩhacũnugura õari ãhraa. Eropirã ĩgu ĩhacũnugurare barire airã. Goãmure “Õhaa,” arĩrã, “Irire basome,” arĩbiricãro gahmea. Iri barire basuaro gahmea marire. Eropirã “Irire babiricãque,” gajirã erã arĩcũ peebiricãque erãre. ⁵ ĩgu ĩhacũnugura iri õari arĩcũ weretuhapũ Goãmũ. Eropirã ĩgure “Õhaa,” mari arĩra pũhrũ “Iri bari õari bari ãhraa,” arĩ baro gahmea marire.

Jesu pohro majagu õagure werepũ Pablo Timoteore

⁶ I yũ wererare diaye majare Jesu yarãre buhegu Jesucristo pohro majagu õagu ãhraa mũhũ. Eropa buhegu õari buherire peenũrugũ arĩguca. Õaro mũ peerare peenũrugũ masipehogũ arĩguca mũhũ. ⁷ Eropigu eropa erã arĩ bocarare, Goãmũ ya maja arĩbirirare peebiricãque. Eropigu Goãmũ gameri dihtare iiniguicãgu arĩque mũhũ. ⁸ Mũ mohmepocũ õañaria. Mũ mohmepodiro tauro Goãmũ gamerire mũ iipocũ õataria mũre. Goãmũ gamerire iipogu dohpaguere õaro ãhraa mũhũ. Eropigu mũ sirira pũhrũgue sãre masa mũriagu õaro arĩguca mũhũ. Eropigu Goãmũ gamerire iiniguicãque. ⁹ Iri diaye ta ãhraa. Arĩpeherã irire yũ arĩrare masirã, “Diaye ta ãhraa,” arĩro gahmea erãre. ¹⁰ Eropigu arĩpeherã yũ arĩrare masirã “Diaye ta ãhraa,” erã arĩburire Goãmũ gahmemi. Eropirã erã eropa iiburire mari turaro mohmea. Eropirã ñero taria mari gajirã marire ñero erã iicũ. Goãmũ ojocarigu arĩpeherãre peamegue wabonirãre taugũ ãhrimi. ĩgure umupeorã tamerare ĩgu taumi. Goãmũ marire õaro iiburire masirã ĩgure mucubirirã iiaa. Eropa mucubirirã Goãmũ gameripũre masa iiburire bũrigã buhe mohmea mari.

¹¹ Iri arĩpeheri yũ arĩrare doreque Jesu yarãre. Eropigu irire buheque mũhũ. ¹² Mamũ mũ arĩcũ ĩarã gajirã Jesu yarã mũre peediabiribocoma. Erã mũre peeboro dopa õpa ii ĩhmuque erãre: Masare mahique. Eropigu Jesure umupeoturaniguicãque. Eropa arĩgu dipuwaja marigu arĩque. Mamũ arĩqueregu ta mũ irire iicũ ĩarã mũre peerãcoma erã. Eropirã mũ wereniguirire peerã, mũ iirare ĩarã mũre ĩhacũrãcoma. ¹³ Eropigu mũ pohrogue yũ ejaboro core õpa ii õaro mohmeyuque. Jesu yarã gamenererãre Goãmũ yare gojarapũre buhe ĩhmuque erãre. Eropigu erãre irire buhetuha werenemoque daja. Eropigu erãre õaro masinemocũ iique. ¹⁴ Ero core Jesu yarã oparã Goãmũ dorecũ erãpũ mũ weca erã mojotorire duhpeoma. Erã mũre eropa duhpeocũ Goãmũ ĩgu turarire odi arĩmi mũre. Eropigu Goãmũ ya arĩburire mũ mohmemasiburire apidigu arĩmi mũre Goãmũ. ĩgu mũre eropa mohmemasiburire apirare cãdijibita.

¹⁵ Yũ eropa wererare guña eropa iiniguicãque mũhũ. Mũ eropiira pũhrũ õarire mũ iinemocũ arĩpeherã ĩarãcoma. ¹⁶ Mũpũ õaro iique. Eropigu õaro buheque mũhũ gajiropa buheri arĩgu. Mũhũ eropiigu ĩgu taudigu arĩgu Goãmũ mera arĩniguicãguca. Eropirã mũre peenirã sã ĩgu taunirã arĩrã Goãmũ pohro arĩrãcoma.

“Jesu yarãre õpa iique mũhũ,” arĩpũ Pablo Timoteore

5 ¹ Ne bũgure turibiricãque. Mũ pagure mũ õaro iidiro dopa ta, bũgu sãre õaro mera wereque. Eropigu mũ pagũ porãre mũ õaro iidiro

dopa ta, mamarã sãre òaro umupeori mera erãre wereque. ²Eropigu mũ pagore mũ òaro iidiro dopa ta mũrã nome sãre òaro umupeori mera wereque. Eropigu mũ pagũ porã nomere mũ òaro iidiro dopa ta, nόμε sãre ñero ñaribejaro mariro òaro umupeori mera wereque erãre.

³Eropigu wapeweyarã nomere diaye ta mojomorocũrã nomere umupeori mera itamuque erã nome sãre. ⁴Wapeweyo porãcũgo igo áricũ pãramerãcũgo igo áricũ sãre, erãpũ igore itamuporo erã masura waja. Eropa itamurã Goãmũ masare erã acawererãre ñgũ itamudoreldiro dopa ta iirã iima erã. Erã eroplicũ ñagũ òaro Goãmũ mucubirimi. ⁵Mojomorocũgo wapeweyo acawererã moogo áriigo, Goãmũ igore itamuburire cohremo igoa. Eropigo ñamiri ñũcũ, ñmũri ñũcũ igo Goãmũre eropa serẽniguicãmo. ⁶Gajigopũ wapeweyo áriigo eropa iimaacãgo áriigo ojocarigo áriquerigo igo sũporã dederebo sũridigo iro dopa ta iimo. ⁷Eropigu i áripehreri yũ werera wapeweyo itamuburire Jesu yarãre iidoreque mũhũ. Òpa wereque erãre òari dihtare erã iiburire gajirã erãre werewũabiriburire. ⁸Eropigu yujugũ ñgũ acawererãre ñhadibubigu, ñgũ porã erã pago sãre òaro ñhadibubigu “Jesu yagũ ãhraa,” arĩmasibeami. Goãmũ dorediro dopa iibeami. Eropigu Goãmũ ya buherire yũhribigũ ãhrimi. Jesure gamebirã tauro ñetariagũ ãhrimi ñgũpũ.

⁹Wapeweyarã nome mũa itamumorã áricũ erã waĩre gojaturãca. Mũa eropa gojaturã òpa áriřãre erã waĩre gojatuque. Sesenta bojori ejabigo igo waĩre gojatubiricãque. Eropirã wapeweyo yujugũ ta marapũcudigore gojatuque. ¹⁰“Igo òarire iigo ãhrimo,” masa erã arĩgore gojatuque. Eropirã igo porãre òaro masugo áridigore gojatuque. Eropirã igo ya wihire gajirãre òaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, áripehrerãre mojomoro ñagore, òari dihtare iidigore gojatuque. Eropa áriřãre ñagũ iripũ ta erã waĩre gojatuque mũa erã mũa itamumorã áriřborore.

¹¹Wapeweyarã nόμε, nόμεñari erã áricũ erã waĩre gojatubiricãque erã Jesu yarãre itamumorãre. Pũhrũ erã waĩre mũa gojatura pũhrũ erã gamero iidiarã Cristo yare duhu, dipaturi mojoto diribocoma. ¹²Eropirã erã mojoto dirirã Cristore “Mũ yarãre itamugora,” erã arĩdirore iibiribocoma. Erã eropa iibirira dipuwaja dipuwajacũrãcoma. ¹³Erã nόμεñari eropa itamurã áriřã tericũrã nome wahama. Eropirã wirigue ñajacurirã ñeri querere werenigui curima. Erã weredorebirirare werema erã nome. ¹⁴Eropirã erã Jesu yarãre itamumorã ñajabiricãporo. Eropigu erã òpa iicũ gahmea yũhũ: Wapeweyarã nome, nόμεñari áriřã mojoto diriporo daja. Eropirã erã porãcũporo. Eropirã erã ya wihi majare òaro ñhadibuporo. Erã nome wapeweyarã nome eropa ta iicũ marire Jesu yarãre ñhaturirã “Ñerire iirã iima,” arĩmasibeami marire. ¹⁵Dohpague tamerare yujurãyeri nome wapeweyarã nome Cristo yare duhu watĩ gameripũre iinugatuhama. Eropigu òpa werea mũre.

¹⁶Jesu yarã erã acawerego wapeweyo igo áricũ erã igo acawererãpũ igore itamuporo. Gajirã Jesu yarãpũre igore itamudorebiricãporo. Eropirã erã Jesu yarã igore acawererã opagore itamubirã, gajirã nome wapeweyarã nomepũre itamumasima.

¹⁷Jesu yarã oparãre erã mohmerire erã òaro iicũ ïarã umupeoque erãre. Eropirã òaro wajayeque. Yujurãyeri mua mera majarã Goãmũ yare wererã muare buherã sã àhrima. Erã tamerare tauro umupeo wajayeque. ¹⁸Goãmũ yare erã gojarapũgue mohmegure mua wajayeborore òpa werea: “Wecũ trigo yerire cùhratiacũ ïgu disirore cãhmotabiricãque. ïgu gamero baporo,” arĩ gojañorã. Eropiro gajipũ òpa arãa: “Mohmegure ïgu mohmeri wajare oro gahmea,” arãa Goãmũ yare erã gojarapũgue. Goãmũ ya gojarapũ eropa arĩcũ peerã oparãre òaro umupeoque mua. Eropirã òaro wajayeque erãre.

¹⁹Jesu yarã mera majagu opure yujugu ta ïgure weresãcũ peebiricãque. “Opũ ïgu òpa ñeri iirare ïabu,” perã o urerã arĩ weresãra pũhrũ peeque. ²⁰Eropa peerã ïgu ñero iira arĩcũ ïatuhaja Jesu yarã gamenererogue turique ïgure, gajirã ïgure ïha masi giiporo arĩrã.

²¹Eropigu Goãmũ Jesucristo ïgu beyerã anyua erã ïhabeoro ire dorea mure. Dohpague yũ mure dorerare ipehoque. Eropa iigu gajigure gajiropa, gajigu sãre gajiropa iibiricãque. Yujuropa ta iique arĩpehrerãre Jesu yarãre. ²²Gajirãre Goãmũ mohmerire mũ beyemorãre erã weca mũ mojotorire duhpeoboro core òaro ïaque mũhũ ïha masiri mera yojaro mariro. Ñerire iirã arĩbocoma. Eropigu mũ erãre beyera pũhrũ erã ñerire iicũ erã ñeri iira dipuwaja opagũca mũ sã. Eropigu erãre beyeboro core erã arĩricurire òaro masique. Eropigu arĩpehreri ñeri mariro arĩque mũhũ.

²³Bajasuburi paru pũrisũgu àhraa mũhũ. Eropigu dohpaguere deco dihtare ihrigu arĩgu, merogã vino sãre ihrique mũhũ ococũgu.

²⁴Yujurãyeri erã ñerire iicũ mari ïhaa. Eropirã Goãmũ erãre dipuwaja moaborore masia mari. Gajirãpũre erã ñeri iirare mari ïha masibeaa. Pũhrũ erã ñeri iirare masirãca Goãmũ dipuwaja moarinũ arĩcũ. ²⁵Eropa ta yujurãyeri òarire erã iirare masia mari. Gajirã erã òarire erã iirare dohpaguere masibiriquererã ta pũhrũ masirãca mari. Mari ïabirirare arĩpehrerã erã iirare pũhrũ iri dehyoacũ ïarãca.

6 ¹Pohro majarã Jesu yarãpũ erã oparãre òaro umupeoporo. Erã eropa umupeocũ ïarã gajirã Goãmũre mari arĩ buheri sãre ñero werewuamasibeama. ²Erã oparã Jesu yarã arĩcũ ïarã erã pohro majarãpũ gũa oparã sã Jesu yarã ta àhrima. Eropirã “Erãre umupeobiricũ òaroca,” arĩbocoma. Eropa iibiricãro gahmea. Erã oparã Jesu yarã arĩrã erã mahirã yujugu porã iro dopa àhrima. Eropirã erã tamerare turaro itamuporo.

Goãmũre umupeori sãre, òaro arĩri sãre werepũ Pablo

³I yũ wererare buheque. Eropigu ire doreque. Gajiropa arĩrre gũyarire buherã mari Opũ Jesucristo ya buherire umupeobeama. Erã Goãmũre umupeori buherire gamebirã òpa iirã àhrima. ⁴“Masipehogũ àhraa,” arĩquererã ta diaye majare ne masibeama. Eropirã pee masibirã iro dopa ta turaro game dũyasodiama erã. Eropirã Goãmũ yare arĩmaacãa dũyasorã àhrima. Eropa dũyasorã, game ïhatuirã wahama. Eropirã gajirãre ñero quere

moamasibiriquerã masare ñero arĩ pepima erã. ⁵Eropirã erã ñeri dihtare pepiniguirã, diaye áririre ne masibirã eropa duyasoniguicãma. Eropirã “Goãmũ yare buherã niyerure wajatarãca,” arĩ pepirima. Erã eropa árirãre wapicubiricãro gahmea. ⁶Mari ya mari opari mera mucubirirã Goãmũre umupeorã diaye ta wajatarã ta iiaa. ⁷I yebaguere masa dehyoarã ne gajinore aĩgãbiriribu mari. Eropirã mari sirirã warã ne gajinore aĩgãmasibea mari daja. Eropirã mũa opari mera dihta mucubirique. ⁸Eropirã mari barire, mari suhri sãre oparã, gajire gamenemobiricãrã. Iri nũcu mera ta mucubiricãrã mari. ⁹Niyerure gamerã doberi wũaro oparã árdiarã watĩ ñerire ĩgu iidorerire áripehleri ñerire iirã áribocoma. Eropirã erã bajasuburi pee masibirã iro dopa ta gajinore gametarirã, ñeri uaribejari duhubirã, erã basi ta ñero tarima. Eropa dedererã wacãrã iima. ¹⁰Niyerure gametarirã áripehleri ñerire iinũgama masa. Yujurãyeri niyerure gametarirã, Jesure umupeo duhura pũhrũ bajasuburi erã ñero iira waja turaro bujawerema erã. Eropirã mari opariñepẽ ta mucubiriro gahmea marire.

Goãmũ ya áriburire iiboro dopa ñerire tarinũgaque, arĩ gojañumi Pablo

¹¹Mũ tamera Goãmũ yagũ ta áhraa. Eropigu i ñerire iibiricãro gahmea. Eropigu õaripũre gameque. Goãmũ yare iique. Eropa iigu Jesure “Diaye iigu áhrimi,” arĩ umupeoque. Eropigu gajirãre mahique. Ñero tariqueregu ta bocatiique. Nijiyajagũ árique masa mera. Eropigu gajirãre tarinũgadiagu áribiricãque. ¹²Ĩgu mera áripehlerinũri mũ õaro áriniguicãburire Goãmũ beyemi mũre. Eropigu Jesucristore mũ umupeorire bajarã masare õaro werebũ mũhũ. Eropigu ñero tariqueregu ta ĩgũre umupeo ĩgu yare duhubita uarogue ĩgu mera eropa mũ áriniguicãboro dopa. ¹³Goãmũ áripehlerãre áripehlerire áricũ iigu áhrimi. Jesucristopũ Poncio Pilatore Goãmũ yare õaro werepũ. Eropigu Goãmũ Jesucristo sã erã ĩhabeoro ire mũre iidoregura: ¹⁴Mũre Goãmũ ĩgu dorere iipehocãque. Jesucristo ĩgu dujariboro core ñeri mariro, dipuwaja mariro ĩgu dorero dopa ta iiniguicãque. ¹⁵Ĩgu queoranũ áricũ Goãmũ Cristore dujaricũ iigucumi. Goãmũpũ õagu ĩgu dihta masare doregu áhrimi. Eropigu áripehlerã gajirã oparã erã tauro opu árigũ áhrimi. ¹⁶Eropigu ĩgu dihta ne siribigu áhrimi. ĩgu gosesiriri mera árigũ áhrimi. Eropirã masa ĩgu gosesirogue ejamasibeama. Eropigu masa erã ne ĩabigu áhrimi. Eropirã dohpague sãre ĩgũre ĩabeama. ĩgu eropa árigũre umupeorã. Eropirã áripehlerinũri “Turagu áhrimi ĩgu,” arirã ĩgũre. Eropa ta iirã.

¹⁷Eropigu i yeba majarãre doberi oparãre õpa arĩ doreque mũhũ: “Gajirãre tarinũgaa yũhũ,” ne arĩ pepibiricãporo. Erã doberi erã opari pehrea waroca. Eropirã “Yũhũ wũaro opari mera õaro árigũca,” arĩ pepibiricãporo. “Goãmũ yapũ mera õaro árigũca,” arĩ pepiporo. Áripehleri diaye ta mari gameripũre ogũ áhrimi ĩgu Goãmũ. ĩgũpũre umupeoturaporo erã doberi oparã. ¹⁸Eropirã erã õaripũre iiporo õarire erã iirã áriboro dopa. Eropirã erã oparire mojomorocũrãre orã áriporo. ¹⁹Erã eropiicũ umũsigue Goãmũ pohrogue erã ya áriroca. Erogue áricũ iri ne pehresome. Eropirã erogue õaro áriniguicãrãcoma erã.

Pablo Timoteore doretupũ

²⁰Mahgu, mure Goãmũ ãgu apirare ãgu buhedorerare duhubita. Yujurãyeri masa Goãmure gamebirã iro dopa ta guyarire, pee masibirã ya buherire wereniguima. Eropa wereniguirã “Ôaro masirã buheri ãhraa,” arĩrima erã. Eropa erã wereniguirire peenurubircãque. ²¹Gajirã yujurãyeri erã wereniguirire peenururã Cristo ya buheripure cóacãma.

Goãmũ ãgu mahiri mera mure turaro òadorea. Eropa ta árĩnigucãporo. Iripëta ãhraa.